

# INUIT ATAQATIGIIT

## INATSISARTUNI



20. juni 2016.

Matumuuna Inatsisartut suleriaasianni §37 naapertorlugu Naalackersuisunut apeqqutit imaattut ingerlatippakka:

### Apeqqutit:

- 1. Nunatsinni inuit atugaasa pitsanngortinnissaat siunertaralugu akileraartarnikkut, akitsuusiisarnikkut allatigullu aaqqissuussinikkut qanoq iliuuseqarfiginiarpaat?**
- 2. Sulinermik ilanngaat naalackersuisut tungaaniit qanoq ilusilimmik aamma sinaakkutissat qanoq killilersukkat, inuillu kikkunnut iluaquserneqassanersut erseqqissarsinnaavaat?**
- 3. Sulinermut ilanngaat qanoq aningaasaqarnikkut sunniuteqassava nunatsinnut minnerunngitsumillu inuit sulinermik ilanngaammik atuisut qanoq aningaasatigut eqqorneqassappat?**
- 4. Akileraartarnikkut nutarterinissaq naalackersuisuniit oqaatigineqartoq qanoq ilusilersugaassasoq takorloorneqarpa?**
- 5. Akitsuutitigut isertinniarneqartut aningaasarpasuit suminggaanniit isertinneqassappat, aamma kikkut akitsuusiinikkut eqqorneqassappat?**
- 6. Pisuut eqqarsaatigalugit, soorlu assersuusiorutta 900.000 kr.-nik imaluunniit 1 mio.kr.-nik ukiumut aningaasarsisartut pissakinnerniik akileraarnerusalernissaat siunnerfigissallugu naalackersuisut pissusissamisoorsooraat?**
- 7. Naalackersuisut akileraartarnikkut aaqqissuuseqqinnissaq pillugu allamik siunnersuutissaqarunik suut saqummiussinnaavaat?**
- 8. Inuiaqatigiinni pissakinnerit imaluunniit akunnattumik isertitallit eqqarsaatigalugit naalackersuisut qanoq pitsanngorsaanissamik siunnersuutissaqarpat?**
- 9. Inuit suliffissaaleqisut inuiaqatigiinnilu aningaasartuuteqarfiunarpaat inatsisitigut nutarteriffigineqassappata qanoq siunertaqartoqarpa?**
- 10. Inuit pissakinnerpaat akunnattumillu isertitallit akinut qaffakkiartortunut aningaasaqarnermikkut malinnaalersikkumallugit Naalackersuisut qanoq aaqqiiniarpaat?**
- 11. Inuiaqatigiit nunatsinni sumi najugaqarneq apeqqutaatinnagu sapinngisamik naligiinnerusumik atugaqarnissaannik suliniuteqarneq naalackersuisuniit aallartinneqarsimamava? Suut aallartinneqarsimappat?**
- 12. Aningaasarsiakkaat akileraarnerulersissavisigit aningaasarsiakitsut akileraarnikinnerutillugit?**
- 13. Aatsitassarsiornermiit isertitat iluanaarutit nunatta inuisalu iluanaarutaat naalackersuisuniit qanoq periuseqarfigineqassappat?**

- 14. Ilinniartitaaneq sipaarfiginagu pisinnaasat siuarsarlugit, inuillu nunatsinniittut ilinniagaqalersillugit siuarsaanissaq, atugarissaarnerulersitsinissaq, aamma aningaasarsiornikkut qaffasaanissaq naalakkersuisuniit isumaqatigineqarnerluni?**
- 15. Suliffissaaleqisut amerlasuutigut ilinniagaqarsimangitsuupput, aaqqissuusseqqinnermilu pisariaqarpoq iliuseqarfigineqarnissaat. Tamanna Naalakkersuisut qanoq iliuseqarfiginiarpaat?**
- 16. Namminiilivinnissaq paaseqatigiiffiusoq, siuarsaqatigiiffiusoq kivitseqatigiiffiusorlu tamanit peqataaffigineqartariaqartoq anguneqassappat Naalakkersuisut aqutsinermikkut qanoq iliuseqarfiginiarpaat?**

(Aqqaluaq B. Egede, Inuit Ataqtigiiit)

### **Tungavilersuut:**

Nunatsinni inuiaqtigiiit aningaasarsiornitta nutarterneqartariaqartup eqqortumik suliarineqarnissaa pissappat inuit akornanni paaseqatigiinneq suleqatigiinnerlu annertusarneqartariaqarpoq. Suli nukiiit sulisinnaasut tamaasa atunngilagut. Suli inuit atugarissaarnissaannut iliuusissat tamaasa atunngilagut. Aamma suli naalakkersuinikkut nutarterinissaq tulluuttoq paaseqatigiiffiunngilaq.

Allanngortoqartariaqarpoq. Aallartittariaqarpugut, allanngortoqassappallu apeqqutit akineqarnissaat suleriaqqinnissatsinnut pingaaruteqarluinnartussaapput. Taamaammat pingaaruteqarpoq paasissallugu naalakkersuisoqarfinni suliat qanoq ittut ingerlanneqarnerlut paasissallutigu. Pisariaqarporlu politikikkut siunnerfiit qanoq ittut Naalakkersuisuniit tunaartarineqarnerlut. Taakuummatami saqqummiunneqartussat, tungaviusussat, aamma oqallinnermi aallartiffiusussat.

Apeqqutit nunatta aningaasarsiornikkut "sannaata" nutarternissaanut attuumassuteqarluinnartut Naalakkersuisuniit peqqissaartumik akineqarnissaat pingaaruteqaqaaq. Neriullunga aaqqissuusseqqinneq pisariaqartitarput aamma Naalakkersuisut sionersimaarlutik siunnersuutissaqarfigissagaat.

Apeqqutigisakka ullut qulit qaangiutsinnagit akineqarnissaat kissaatigaara.